

## Anexo: Plan de igualdade

### Introdución

No IES San Clemente desenvolvéronse desde 2010 proxectos e actividades que contemplan a promoción da igualdade a todos os niveis.

A día de hoxe, os centros de ensino non son simplemente o espazo físico onde adquirimos unha serie de coñecementos, senón tamén un contexto no que acadar valores e actitudes de respecto que axuden a harmonizar a convivencia nos propios centros e nas sociedades nas que vivimos. Neste sentido, o presente Plan de Igualdade busca achegar actitudes de igualdade de xénero á comunidade educativa do IES San Clemente e ideouse tendo en conta a peculiaridade do noso alumnado..

Por esta razón, e porque o método de traballo de cursos precedentes debe ser revisado e a actividade a desenvolver axeitada cos obxectivos perseguidos, este proxecto busca consolidar un método de traballo que se poida levar a cabo de forma continuada no presente curso escolar e nos cursos posteriores, polo que sería considerado como plan plurianual.

Pódese consultar este proxecto no seguinte enderezo:  
<https://www.iessanclemente.net/obradoiro-da-igualdade/obradoiro-da-igualdade-equipo/>

### Estudo da Igualdade do centro

#### Situación do profesorado

O profesorado encargado de bacharelato e ESA a distancia, en canto a igualdade de xénero presenta unha distribución equitativa.

Pola contra, no caso das ensinanzas de FP de Informática que levamos a cabo no centro, a presenza da muller no perfil de profesorado é notablemente inferior á presenza masculina.

A actitude xeral do profesorado cara a Igualdade é positiva, aínda que se pretende mellorar coa participación activa en actividades e proxectos, así como eliminar certos perxuízos que poidan haber respecto desta temática.

#### Situación do alumnado

O alumnado é de procedencia xeográfica e clase social variadas:

- O alumnado dos ciclos formativos (ordinario, modular e a distancia) non só provén dos concellos limítrofes, senón de toda Galicia.
- O alumnado matriculado na ESA telemática procede de toda Galicia.
- O alumnado inscrito en Bacharelato procede de toda a comunidade, por ser este centro o único en Galicia que imparte esta modalidade a distancia. Pero constatamos, pola comunicación mantida a través da

plataforma virtual, que pode atoparse fóra da comunidade e mesmo do país mentres realiza os seus estudos.

En canto a igualdade de xénero, no caso dos ciclos de informática que aquí se imparten, tanto presencialmente como a distancia, a meirande parte do alumnado son homes. Por tanto, consideramos que é importante visibilizar a figura da muller e promover actitudes de respecto nun ámbito tecnolóxico xa que na sociedade actual segue a ter principalmente unha presenza maioritaria masculina.

O Obradoiro da Igualdade pretende traballar diferentes aspectos da Igualdade a través de concursos, actividades culturais e proxectos que, aínda que sexan compartimentos estanco nas vidas do alumnado, contribúen a mellorar a actitude e a eliminar prexuízos. Tamén queremos facer ver ao alumnado e ao profesorado que a igualdade é importante para a nosa sociedade.

## Obxectivos

Pretendemos comezar un proxecto baseado na igualdade e visibilización da muller, o cal persigue distintos obxectivos:

- Sensibilizar á comunidade educativa sobre a actual situación desfavorable da muller en distintos ámbitos.
- Dar pé á reflexión e concienciar á comunidade educativa da necesidade da igualdade entre homes e mulleres, para lograr unha sociedade máis xusta e respectuosa.
- Promover a igualdade entre homes e mulleres para evitar actitudes machistas e micromachismos, estereotipos, roles de xénero e cosificación da muller.
- Presentar modelos de empoderamento da muller e actitudes de sororidade.
- Mostrar ao alumnado a presenza da muller en calquera ámbito (artístico, tecnolóxico, científico, etc.)
- Promover no noso alumnado valores encamiñados á igualdade de oportunidades entre homes e mulleres, así como á conciliación da vida familiar, persoal e laboral.
- Incentivar ás alumnas na procura de postos de traballo de responsabilidade, rompendo o teito de cristal.
- Previr a violencia física, sexual, verbal e económica que se segue a exercer sobre as mulleres.
- Axudar ao alumnado a identificar relacións tóxicas dentro das relacións amorosas entre homes e mulleres.
- Empregar unha linguaxe inclusiva (tanto oral coma escrita), que teña en conta tanto a homes coma a mulleres, de xeito que estas sexan tamén visibilizadas e representadas.
- Facilitar ao profesorado distintas ferramentas e recursos pedagóxicos para traballar esta temática.

- Realizar un informe a modo de avaliación sobre a evolución das actividades previstas así como do grado de consecución dos obxectivos, incluíndo propostas de mellora para o curso 2022-2023.

## Organización

No IES San Clemente constituíuse un equipo integrante do Obradoiro da Igualdade, nomeado e supervisado pola dirección do centro.

A continuación indícase a composición do Obradoiro de Igualdade do IES San Clemente:

<b>Isabel Gamallo Gómez</b>	<b>Coordinadora</b>
Manuel Gómez Rey	
Carmen María Otero Cruz	

Os membros do Obradoiro de Igualdade formamos un equipo multidisciplinar, xunto con outros docentes colaboradores, que imparten clase en ESA, Bacharelato e FP. O noso labor vaise encamiñar principalmente por dúas vías, en función de se nos estamos a dirixir ao alumnado presencial ou a distancia.

Para chegar ao alumnado a distancia, crearase un blogue onde terán acceso a recursos e materiais relacionados con esta temática coa finalidade de sensibilizalos na igualdade. Tamén, nunha reunión inicial, se informou ás mestras e ós mestres dos obradoiros da ESA de distintos Concellos sobre este blogue onde terán acceso a recursos que poden traballar na aula. Estes recursos serán principalmente viñetas e pequenos textos que dean pé á reflexión individual e grupal sobre o patriarcado, estereotipos, roles de xénero, cosificación da muller, micromachismos, empoderamento, a situación actual da muller na nosa sociedade, etc. Entendemos que grande parte do alumnado ao que pretendemos chegar está nada ou pouco concienciado con isto (como reflexo da sociedade na que vivimos) e, polo tanto, partiremos dun nivel básico pero esencial, aludindo a situacións do día a día, loitando así para desterrar actitudes machistas da nosa sociedade.

De cara a traballar co alumnado presencial, prevese a súa participación en actividades que se desenvolverán ao longo do curso, especialmente en datas sinaladas como o Día Internacional para a Eliminación da Violencia de Xénero (25 de novembro) e o Día da Muller (8 de marzo). Estamos tamén pendentes da programación de diferentes charlas, exposicións e materiais didácticos para traballar co alumnado de FP do noso centro, así como a implicación de máis profesorado para a elaboración de recursos que teñen como eixo principal a temática da igualdade e a visibilización da muller.

## Actividades principais

O Obradoiro da Igualdade do IES San Clemente leva varios anos de traxectoria realizando múltiples actividades ao longo de todo o curso.

Algunhas delas repítense anualmente con éxito. Cabe destacar o concurso literario que xa leva 33 edicións.

A continuación descríbense con detalle as actividades principais propostas para o presente ano escolar.

### Concursos e certames

Temos previstas novas convocatorias de concursos e certames que tiveron éxito en anos anteriores e novos concursos nos que ademais do alumnado, tamén poderá participar o resto da comunidade educativa. Pretenden estimular a creación artística para o fomento da Igualdade.

- 3º Certame de Cartazes para conmemorar o 25N
- 3º Certame de fotografía "Mulleres na sombra"
- 2º Certame radiofónico "Mulleres na sombra"

Os premios son vales de material educativo e informático.

Este ano continuaremos coas actividades de difusión e sensibilización mediante campañas como a do 25N contra a violencia de xénero, a 11F Día da muller e a nena na ciencia e 8M día internacional da muller.

Acolleremos no centro a exposición itinerante da Universidade de Vigo "As mulleres que nos levaron á lúa".

Colaboración co clube de lectura do IES San Clemente "Club Tripé" e o EDLG no 3º Concurso Experiencia Lectora:igualdade .

### Proxectos eTwinning

De cara a traballar a Igualdade en colaboración con outros centros escolares distribuídos xeográficamente polo mundo, temos como obxectivo para este curso lectivo, comezar un proxecto na plataforma eTwinning.

Para desenvolver o proxecto, os participantes traballan nunha plataforma en liña que tamén serve para difundir os resultados:  
<https://twinspace.etwinning.net/>

## Difusión dos resultados

A difusión do resultado das actividades farase a través de:

- Web: [www.iessanclemente.net](http://www.iessanclemente.net)
- Facebook: [www.facebook.com/iessanclemente](http://www.facebook.com/iessanclemente)
- Twitter: [twitter.com/iessanclemente](http://twitter.com/iessanclemente)
- Instagram: [www.instagram.com/iessanclemente](http://www.instagram.com/iessanclemente)